

առաւօտից մինչեւ երեկոյ, անդադար չարժման մէջ է: Նրա ամենատես աչքերը ամէն բանի վրայ կը նայէին եւ ամէն բան կը դիտէին. նրա անհանգիստ լեզուն ամէն բանի մասին հարցմունքներ կանէր եւ անվերջ հաշիւ ու համարներ կը պահանջէր: Մինչեւ մահ նա չթողեց ձեռքից իր կառավարութեան գաւազանը – ահագին փայտեայ շերտփը, որով նա ընթրիքի եւ ճաշի ժամանակ կերակուր էր բաժանում: Մինչեւ նրա մահը մեր տան թէ մեծը եւ թէ փոքրը ամենայն խոնարհութեամբ հպատակում էին նրա հեղինակութեանը:

Տառտ շատ աշխատասեր կին էր: Ես դեռ յիշում եմ, թէ որպէս գիշերի մեծ մասը, նստած այծի մորթի վրայ, դնում էր իր առջեւ մանելու մեքենան, եւ ոսկրացած ձեռքով, պտոյտ տալով ճախարակի թելքը, բամբակից թել էր պատրաստում: Ինձ թւում է, թէ դեռ զարկում է իմ ականջներին պառաւի դողդոջուն մեղեդին իր տխուր, մելամաղձական հնչիւններով. ինձ թւում է, թէ դեռ լսում եմ նրա նահապետական մեքենայի խուլ ճռճոցը:

Մեր գիւղում տատս համարում էր խելացի պառաւներից մէկը, իսկ իր տան մէջ նրա իմաստութիւնը հասնում էր անսխալականութեան: Շշմարիտն ասած, ես էլ փոքր ժամանակս հիացած էի նրա իմաստութիւնով: Նա ամէն բան գիտէր: Նա գիտէր, թէ ի՞նչ նշանակութիւն ունեն այս եւ այն երագները: Նա գիտէր, թէ ի՞նչ խորհուրդ ունեն, երբ մարդու մարմնի այս ու այն մասերը «խաղում են»: Նա հասկանում էր կաշաղակի լեզուն, եւ բացատրում էր, թէ ի՞նչ լաւ խաբարներ է բերում նա, երբ մեր պատի վրայ նստած կշկչում է: Նա լսել չէր կարող բոի չարագուշակ ծայնը, եւ պատուիրում էր ինձ՝ քարով սպանել նրան, երբ կը նստէր մեր պատի վրայ: Նա գիտէր, թէ ինչու՞ Սողոմոն իմաստունը անիծեց ճնճիկին, կամ ո՞վ դրեց յոպոպի գլխի վրայ այն գեղեցիկ փետուրե սանդղը:

Այո՛, տատս շատ բան էր իմանում: Նա պատմում էր ինձ, թէ ինչպէս կը հասնի աշխարհի վերջը, կամ երբ կը յայտնուի Նեռը: Նա ասում էր, թէ անիծեալ Նեռը կը գայ, մի ահագին էշի վրայ նստած, թէ նրա աւանակի ականջները այնքան երկար կը լինեն, որ մի ականջի ծայրը կը հասնի մինչեւ արեւմուտք, իսկ միւսինը՝ մինչեւ արեւելք: Նա ասում էր, թէ այն ժամանակ կ'այտնուին «աջուջ-մաջուջները», թէ դրանք այնքան փոքրիկ թզուկներ են, որ իմ կօշիկները կարող էին նրանց համար բնակարաններ լինել:

Բայց ես աւելի սիրում էի տատիս հեքիաթները:

Ես դեռ յիշում եմ մի քանի հեքիաթներ, որ գիշերները պատմում էր նա: Երբեմն, մի անգամ սկսած հեքիաթը վերջացնում էր մի ամբողջ շաբաթայ ընթացքում: Ա՛խ, ինչպէս լաւ պատմում էր նա: Ես բոլորը, բոլորը հասկա-